

共同經課-1 列王紀下二章一節～十二節

1 耶和華 beh 用捲螺風接以利亞上天 ê 時，以利亞 kap 以利沙 tùi Kiat-kah 去。2 以利亞 kā 以利沙講，你請 tiàm chia，因為耶和華差我去 Pek-ték-lī。以利沙講，我 kī 永活 ê 耶和華，kap 你 ê 活命來 chiù-choā，我無 beh 離開你；兩人就落去 Pek-ték-lī。3 Tī Pek-ték-lī hiah-ê 先知 ê 學生出來見以利沙 kā 伊講，耶和華今 á 日 beh 取你 ê 老師離開你去，你知 mah？伊講，是，我知，lín 莫做聲。4 以利亞 kā 伊講，以利沙 ah，你請 tiàm chia，因為耶和華差我去耶利哥。伊講，我 kī 永活 ê 耶和華，kap 你 ê 活命，來 chiù-choā，我無 beh 離開你。In 就到耶利哥。5 Tī 耶利哥 hiah-ê 先知 ê 學生就近以利沙，kā 伊講，耶和華今 á 日 beh 取你 ê 老師離開你去，你知 mah？伊講，是，我知，lín 莫做聲。6 以利亞 kā 以利沙講，你請 tiàm chia，因為耶和華差我去約旦。以利沙講，我 kī 永活 ê 耶和華，kap 你 ê 活命，來 chiù-choā，我無 beh 離開你。In 兩人就相 kap 去。7 有先知 ê 學生五十人去，遠遠 khiā tī in ê 對面；兩人 tī 約旦河邊 teh khiā。8 以利亞 thèh 伊 ê 外衫捲起來，pah hiah-ê 水，水就分雙 pêng；兩人行乾地過去。9 過去了，以利亞 kā 以利沙講，我 iáu 未受取離開你去，我 beh kā 你做甚麼？你 taⁿ tiòh 求。以利沙講，求你將感動你 ê 神 hō 我雙份。10 以利亞講，你所求 ê，oh 得 ah；總是我受取離開你 ê 時，你若看見我，就 beh 得 tiòh；若無，就 boē 得 tiòh。11 In teh 行 teh 講，忽然有火車火尾，隔開 in 兩人；以利亞就坐捲螺風上天。12 以利沙看見，就叫講，我 ê 父 ah，我 ê 父 ah，以色列 ê 戰車 kap 伊馬兵 ah。後來無 koh 看見伊；就 thèh 家己 ê 衫來拆做兩 pêng。

共同經課-2 詩篇五十篇一節～六節

1A-sat ê 詩。1) 全能 ê 上帝耶和華有講出話，來召天下； Tùi 日出到日落 ê 所在。2 Tùi 齊全 súi ê 錫安，上帝有發出光。3 阮 ê 上帝 beh 來，決斷無靜靜；有火 tī 伊 ê 面前 teh 燒，有風 tī 伊 ê 四圍真透。4 伊 beh 叫頂面 ê 天 kap 地；為 tiòh beh 審判伊 ê 百姓；5 講，tiòh 招集我聖 ê 百姓來我 chia，就是 hiah-ê 用祭祀 kap 我立約 ê 人。6 Chiah-ê 天 beh 顯明伊 ê 公義；因為上帝本身是做審判 ê。 [Sè-láh]

共同經課-3 哥林多後書四章三節～六節

3 若阮 ê 福音有所遮蓋，就是遮蓋 tī 沉淪 ê 人。4 Tī in 中間，chit 世界 ê 上帝 hō m̄ 信 ê 人 ê 心 chhiⁿ-mī，免得基督榮顯 ê 福音 ê 光照 in；基督就是上帝 ê 像。5 因為阮無傳家己，是傳基督耶穌做主，也本身為 tiòh 耶穌做 lín ê 奴僕。6 因為上帝 bat 講，光 tiòh tùi 暗裡出來 ê，伊也有照 tī 阮 ê 心，hō 阮 tùi bat 上帝 ê 榮顯，就是 tùi 耶穌基督顯明 ê，來得 tiòh 光。

共同經課-4 馬可福音九章二節～九節

2 過六日耶穌帶彼得、雅各、約翰，另外 chhoā in peh 上高山，kan-ta in kap 伊 tī-teh；3 當 in ê 面前形狀變換，伊 ê 衫燦爛，極其白，世間漂布 ê boē 會 hō 伊白到 án-ni。4 有以利亞 kap 摩西對 in 顯現，kap 耶穌講話。5 彼得對耶穌講，拉比，咱 tī chia 真好，阮來搭三間寮 á，一間 hō 你，一間 hō 摩西，一間 hō 以利亞。6 是伊 m̄ 知 tiòh 怎樣講，因為 in 真驚。7 就有雲罩 in，koh 有聲 tùi 雲裡出講，chit-ê 是我疼 ê Kiáⁿ，lín tiòh 聽伊。8 In 忽然四界看，無看見一人，只有耶穌 kap in tī hia nā-tiāⁿ。9 In 落山 ê 時耶穌禁 in 講，人子 iáu-bē tùi 死人中 koh 活，莫得用所看見 ê kā 人講。